

陶文毅公全集

關文毅公全集卷五十九目錄

詩集 七言律詩

庚申中秋關中望月

大汴灘

望君山

赤壁懷古

舟至江夏

湯陰拜岳忠武廟

銅雀臺

途中簡王萬泉先生

育

樂城早發

落花

辛酉夏日同友人散步永定門外道旁柳色濃綠

如窠眷然有感用阮亭秋柳韻

京邸端午

送陸平泉師督學貴州

送方柘墅

同照南歸

重陽同羅卷齋

萬

陳青江

綱

彭荊谷

間

步德勝門

外有作

柘墅將南歸省親行有日矣繼以選期在即有留

意詩以果之

松筠庵拜楊忠愍公遺像

寄益陽諸友

雪

小除得家書作

壬戌上元散步

四月二十九日

圓明園引

見蒙

恩選庶吉士恭紀

送喻義圃

宣孝

南歸

得假南歸留別同寓諸君

夜發柏鄉寄同年馬湘門

朱仙鎮岳廟用趙承旨岳墳韻

南陽望臥龍岡有懷諸葛武侯

襄陽道中卽事

沔陽舟中書懷

十一月八日舟抵長沙時 大人先至一月矣

大人於六月內避疾諸醫束手有異人與藥得

愈拜見之下悲喜交集是夕蘭亭兄置酒爲歡

感而賦此

春日隨大人暨諸友游啟齡寺

藍田同劉茂才先正柳茂才後選蕭茂才伯魁李

上舍照軒小集

贈別劉孟遴茂才

橋頭河乘小舸往湘鄉

漣濱書院同陳青江綱夜話

次韻答譚安翁廣文

舟過湘潭

酬鄧梅亭卓豈麓阜

同友人話舊

登陽道中

舟泝湘江

長沙別子晉

寄周靜山師湘潭

漢陽後湖散步同王平舫

可權

謝玉峰

隆俊

重登黃鶴樓

甲子四月杪至院銷假口占

送謝薌泉先生

振定

典試秦中

送同年李芝齡

宗昉

典試秦中

乙丑四月二十日散館引

見蒙

恩授編修恭紀

和李北溟學士

宗瀚

秋海棠詩

重登岳陽樓

登彭山

家靈長

章泗

沒於易州未知旅櫬南歸否哭之以

詩

楊花四首次黃伯良

本驥

韻

胡京南齋中晤劉伯觀

瀾

閱其詩及駢體文歎爲



昇才生卽席呈詩有伏櫪自慚逢伯樂買絲曾  
擬繡平原之句作此答之

同門人黃生植徐作梅尹應聯蕭自惺楊大有潘

德讓游水月林

送史柘溪方伯積英入京

同門人李如琳黃冠楚周伯升雷承厚楊名燦張

允懷重游水月林用楊生韻

雨後望彭山

仙眠洲納涼

東田別後有詩見寄次韻答之

戊辰閏五月杪將白澧州歸里留別書院諸子時

將北上

制義舊藁失去惟友人吳啟富有鈔本求之再三

始得賦此寄之

會賓谷

煥

廉訪餞席賦此

涵碧亭雅集爲黃文節公生日

登大別山

寄黃謬軒學博

崇正

喜聞子晉入縣學

題豆花圖

初秋同程編修

贊寧

游法源寺

送劉庶常

教五

假歸省親

寄懷唐陶山先生

庚午五月十五日奉

命偕編修

臣

史評典四川鄉試恭紀

由正定至獲鹿

出柏井至平定州

平陽懷古

過涑水橋懷司馬文正公

曉發蒲中

首陽有夷齊廟問之士人多不知惟云有二仙廟  
蓋流俗沿訛也作詩正之

馬上望華山

華州郭汾陽王祠

金氏陂

灞橋

秦中懷古十首

茂陵

馬嵬坡

馬新息侯廟

鳳翔東湖蘇文忠公祠石刻九日一首有憶弟淚  
如雲不散望鄉心與鴈南飛之句讀之悵然有  
懷舍弟子晉輒次原韻書祠壁

由鳳翔至寶雞

過寶雞金臺觀有感

棧道坡陀輿前以緯曳之戲作

七夕寄內黃安人

棧道懷賀耦耕編修

登鳳嶺

紫柏山張良廟

留壩寄懷嚴樂園太守

如煜

出畫眉關

沔縣謁諸葛武侯祠

沔縣道中聞嚴樂園太守至

發昭化縣

有夢哭周氏亡妹

姜伯約祠

縣州

縣州弔張魏公

漢州

新都弔楊升庵先生

初入成都

蜀闡卽事

明府胡竹塘

光瓚

龔瀛橋

仕達

賀霖圃

懋春

邀游

丞相祠堂遂謁惠陵晚歸有作

惠陵

重陽後一日同年司樂齋

為善

劉鈞台

德銓

賴梅

林華鍾

王驪泉

崇本

李琪園

嘉祐

卓海帆

秉恬

約為城外之游遂自萬里橋經百花潭至浣花

草堂賦此

成都登白堊作

燈下讀曹能始蜀通鑑詩意有未盡拈筆續之凡  
得詩八首

眉州蘇文忠公故宅

曉發眉州至清神

游嘉定泌水院

同松軒編修徐司馬

廷鉅

暨縣令許王何李四君

游浚雲山

晚泊杜家場

自嘉州至犍爲



敘州飲荔支酒憶山谷詩白髮永無懷橘日六年

怱悵荔支紅愴然成詩

曉發合江縣望少岷山

泊重慶

舟過忠州懷白香山

曉發萬縣

雨後望下崖

同松軒編修鄧東嵐太守

橫

譚鐵簫通判

光緒

登

白帝城

子陽城

曉過瞿塘

曉發巫山望十二峰

屈沱題三閭大夫廟

秭歸夜泊

自平善壩出南津關

夜宿宜昌

自松滋至太平口

江陵別友人

江陵夜泊有懷羨周洞崖兩伯父暨蘭江從兄子

晉弟時方登陸北上也

峴山羊公廟

渡河西望有懷洪介亭編修

湯陰謁岳忠武祠

正定過趙順平侯故里

送同年邱南屏

樹棠

之官江南

接待寺懷劉敬山先生和賀五耦耕作

送蔡琢軒

世瑛

之官雲南

季壽赴官石樓臨行有詩留別次韻贈之

兒春福殤一月矣痛之未能自已偶檢案上書得

歸震川集有小札云父子之情已矣祇此雙淚

爲吾兒也又欲自禁耶讀之酸鼻知舐犢之愛  
人情類然曾子之責子夏殆猶局外人言耳流  
涕之餘復作二詩以自解

送賀柘農

熙齡

南歸

秋桐

讀李北溟宗丞衡山吟卻和

送王生

懷曾懷孟

兄弟歸蜀

送裴芥舟游越次留別韻

黎環齋寄詩見懷集蘇詩一律答之

余旣集蘇句酬環齋因憶劉伯觀與之居近唱和

必多復集一詩寄伯觀

送林虛亭之官廣昌

送董眉伯之官大庾

壬申元月有

冒上年除夕祥雲密布豫報豐年之瑞推恩敷闔予朝

賀諸臣各加一級恭紀

送歐陽鍾廬備之官羅城

送劉葵圃開誠之官樂安

送楊剛亭侍御健出守廉州

同唐鏡海賀耦耕兩太史游昆明湖

送趙笛樓給諫 慎吟 分巡惠潮嘉道

雪意和鏡海

雪霽喜廖韻樓 敦行 見過

送李次卿 仲昭 歸廣東

送李贊善 宗昉 督學貴州

送朱侍講 士彥 督學湖南

秋日懷古八首

送吳同年 超 之官樂陵

次韻答周實夫見寄

恭繕

御製詩二集進呈蒙

恩賞表裏二端敬紀

奉贈李小松前輩

鈞簡

送朱編修

榮

出守瓊州

甲戌三月初四日蒙

恩擢江南道監察御史恭紀

楊介坪前輩

澤會

夢人餽以盤桃解者謂爲桃李

公門之象已而會試果得分校入闈籤掣第十

八房乃悟桃字十八兆也伯昂少蘭爲作圖同

人各賦詩紀之

三月廿五日閱三場試卷甫畢而疾作重簾之隔  
藥物多不應時賴朱虹舫前輩日爲診治唐鏡  
海太史朝夕護視可感也作詩以謝

四月初八日闈中病起

次日  
出榜

送同年王半塘

評

之官浙江時令兄采軒大令

訪

同行

出闈次日疾復大作臥牀二十餘日矣張少伊刺

史

學程

獨卹其乏且屬勿使子知其意良摯不

能卻也報以一詩

連日病退喜而有作



送楊飛泉

鶴書

之官浙江

次韻答劉春臺比部

教五

病中見寄

送翟生

榕

回澧州兼寄書院諸舊好

送歐陽坦齋御史

厚均

乞假省親

題芍藥圖卷應李子佩

乙亥元旦朝賀恭紀

翦燈話雨圖爲汪澣雲侍御

梅鼎

作

上元前一夕赴中東坊燈棚作

上元夕赴燈棚作

上元後一夕赴燈棚作

四月二十日蒙

恩擢戶科給事中恭紀

寒香課子圖爲屋圖太守

德生作

送史竹房

夢蛟

之官崇信

詩集 七言律詩

庚申中秋閣中望月

鼉更鎖院夜丁東坐挹秋香桂子風皓月團圓白  
銀枕好雲烘託絳紗籠天開玉宇清虛裏人在冰  
壺朗照中想得至公堂上客高懸明鏡一般同

大汴灘

茱萸江水天邊落五十三灘此最奇怪石當流蹲  
虎豹亂峰趨岸下蛟螭險爭一艣雷同迅浪舞三  
篙雪欲吹爲語春風挂帆客回頭記取上灘時

望君山

螺髻分明翠欲堆湖天都向洞庭開登山漢帝心  
應健流水湘靈恨未灰大橋猶橫柳毅井青蘆自  
長軒轅臺風帆不及維舟問辜負山香送酒來  
赤壁懷古

巉崖如壁矗江東百萬曾經泊戰艦吉利中流能  
賦詠周郎少歲便英雄祚延赤帝還須火雨起蛟  
龍况得風太息霸圖空劫後神鴉飛下夕陽紅

舟至江夏

洞庭片席乘風下放眼蒼茫快此行雨氣欲沈雲  
夢澤江聲直上武昌城濛濛芳草洲邊合歷歷青

山閣外橫便合攜壺黃鶴岸登樓一嘯一杯傾  
湯陰拜岳忠武廟

壞壁剝苔石碣存英雄寂寞恨難吞十年枉灑孤  
軍血三字誰成萬古冤高廟無心圖北伐太師有  
力市中原可憐桑梓庭前樹留得南枝見舊痕

銅雀臺

荒臺一帶雨初消日暮西陵久寂寥瓦片已寒新  
樣硯水聲猶咽舊時簫空將霸氣雄三國不見春  
風鎖二喬千載濁漳河畔路行人東望草蕭蕭

途中簡王萬泉先生

有

郵亭纔過雨廉纖瑟瑟輕塵路不粘野色融春蘇  
草腳人煙分翠上松尖道旁古跡回頭看馬上新  
詩信口占脫帽何妨一斟酌前村應是酒家帘  
樂城早發

又聽郎當破霧行迷離帶夢過樂城相憐鴻鴈同  
千里未打蝦蟇鎮五更河咽斷冰酸馬足沙經宿  
雨軟車聲呼池一望并州野今古蒼茫感客情

落花

誰舞山香曲檻頭研光帽側欠風流半欄紅雨三  
生夢一夕東風滿院愁薄命可堪人出塞銷魂最

是客登樓天涯芳草關情處不獨鵲唳未可休  
同日仙輿去盡忙六銖空記舞霓裳開窗怕見霏  
霏雨掃徑深憐瓣瓣香誤我來時剛半面無人賞  
處賸孤芳春江月色西斜夜抱得琵琶訴別腸  
翦翦風前意態工者番芳信竟成空羅裙有恨誰  
拏綠錦襪臨歸尙印紅洞口雲封春寂寂樓頭香  
渺月濛濛瓊瑤滿眼多飄泊莫更當筵唱惜公  
見說神人喜御風飄零此意豈天公韶華老去春  
如寄妙諦拈來色卽空玉樹底須歌法曲扁舟竟  
自出吳宮癡心付與閒蝴蝶點點香階拾賸紅

記得開尊玩月華幾回銀燭照流霞多情自把金  
鈴繫試手曾將羯鼓搥芳事易窮春闕若香泥不  
斷雨多些輸他年少風流甚收拾紅雲上帽紗  
依約猶能襯舞衣狂華餘慧悟來非半垂簾幕人  
初去重到園亭客竟稀得勢自搏羊角起尋芳令  
趁馬蹏飛隔年小別渾閒事贏得成林結實肥  
辛酉夏日同友人散步永定門外道旁柳色濃綠  
如窩眷然有感用阮亭秋柳韻

東風疊疊蕩花魂賸見千章繞郭門不斷隄邊交  
雨色有情天外漲煙痕長條繫馬前番路密葉藏



鴉何處村拚向酒旗歌板地愁紅慘白莫重論  
陡驚赤帝也飛霜卻是飄零絮滿塘濃黛欲描青  
鏤管殘絲深鎖翠雲箱春辭園角誰依白人到離  
邊尙認王辟暑好騎紅叱撥綠陰陰裏問雞坊  
相逢會爲燕征衣彈指春林事未非殿對靈和殘  
夢繞江橫清弋落花稀黃梅雨過鶯鶯老紫棟風  
多燕燕飛指點郵亭來日路南雲無際重睽違  
滿眼橫陳似小憐漫空晴冑一窩煙爲誰陌上垂  
青瑣猶自風前慘白絲三疊梅花翻舊曲半生萍  
水感華年鞭絲帽影恩恩去添得離情夕照邊

京邸端午

艾符桃印爛朱扉  
客邸深杯獨自揮  
稷亦爭新存楚俗  
兵無可辟仰

皇威休從午日誇  
紅袖怕說丁年尙  
白衣想得鳬飛資  
水岸幾人猶望奪  
標歸

送陸平泉師督學貴州

朗澈冰壺鑑物虛  
風流兩浙舊聲譽  
山鄰宛委藏書啟  
海輶蓬萊麗藻舒  
早向西清濡鍤管  
疊從南國賞輶車  
文章報稱心常切  
尤復

君恩重石渠

瀟湘放舸去年曾。楚水天光一色澄。北斗幾人瞻  
吏部朱衣向夕侍。廬陵千霄虎氣都教上下士。龍  
門亦許登。何日風前小桃李栽培更得曳香綰。

公門半載廁彭宣。座上春風正藹然。知遇感深千  
古事。刮摩功倍數年前。又持鐵網游珠海。仍縮銀  
章出木天。冀北黔南無限意。隨車時有夢魂牽。

西風萬里足離情。况聽蕭蕭落木聲。計到河邊秋  
更老。筭來湖上水猶平。蠻中卿月依虹旆。天末祥  
雲望鳳城。種得新陰歸雨露。旋驂重疊拜

恩榮

送方柘墅

同照

南歸

恰見圖南刷羽翰  
高天星宿映郎官  
同年似此心堪印  
異地相依別更難  
九月鯉魚風色健  
一聲鴻鴈客衣寒  
知君歸到江樓上  
回首停雲仔細看

重陽同羅卷齋

萬

陳青江

綱

彭菊谷

闇

步德勝門

外有作

釀熟茱萸十里香  
蕭蕭落葉滿重陽  
長安居人多新雨  
短劍秋深拂曉霜  
寒憶吳棉按敝篋  
醉偕楚客上高岡  
菊花認是吾家物  
對此如何不憶鄉  
柘墅將南歸省親  
行有日矣繼以選  
期在即有留

意詩以果之

莫向風前踏軟塵非煙翹首正輪囷居貧毛義應  
持檄叱馭王尊亦報親况是三秋同作客那堪兩  
地更懷人開懷且醉黃封酒郭外丹楓已報春  
松筠庵拜楊忠愍公遺像

一官傳舍寄城陰弔古行人淚不禁此事先生真  
有膽當時閣老是何心壯懷枉請朱雲劍浩氣如  
聞信國吟想得靈旗來往夜西風黃葉滿階深  
寄益陽諸友

陣陣梅香入夢新江南定放一枝春遙知燈火西

窗夜共憶風塵北地人居向長安原不易書窺中  
祕詎無因襦衫豫檢花前事莫負諸君望眼頻

雪

伏枕爬沙聽未真開門一望屑霏銀平將世上三  
叉路隔斷人間萬里塵舊隊雲頭迷鶴影他鄉泥  
爪認鴻因請看庭樹花多少都作殷勤客邸春

片片飛花下九霄隨車逐馬盡瓊瑤半天風雨收  
黃襖一幅江山入白描銀錯落從松閣散玉東丁  
帶紙窗搖量來珠粒渾無數誰道長安米價高

小除得家書作

關山迢遞隔天涯回首春風客思賒北地恰逢新  
到鴈青燈猶記昨開花一年離緒看來慰兩字平  
安驗不差卻笑得書情若此泥金何況帖還家

壬戌上元散步

條條軟繡接香筵踏徧花街十里煙午夜春燈隨  
處好一天明月此宵圓紅牙小隊邀金瑤白酒高  
樓對玉船眞箇星橋開鐵柱

曉從鐵柱  
宮觀燈

鼇山頭上

更巍然

四月二十九日

圓明園引

見蒙

恩選庶吉士恭紀

雉扇晴開瑞靄颺  
鑪煙深處觀

君王三年舊夢京華路  
咫尺今瞻日月光天上

恩輝生白屋臣家世業止青箱  
編摩未竟儒生緒慙愧

清班步玉堂

送喻義圃宜孝南歸

聚首眞如得水鱗  
劇憐分隊又滄津  
寸心千古眞知已  
兩度同年亦夙因  
敢道文章推我輩  
莫將事業遜前人  
歸餘細檢羣芳譜  
好種河陽異日春



東華紅軟撲行驕草草都門值別筵秋色遠浮桐  
樹雨衣香猶帶杏林煙千家暮靄閒驅馬一葉西  
風穩放船同是江南欲歸客者番先讓祖生鞭時余亦將請假南旋  
得假南歸留別同寓諸君

憶自春風別故園鴻泥蹤跡倏經年望雲身隔四  
千里捧日心懸尺五天鯉躍幸隨燒尾勢烏私還  
遂省親緣恩恩計到家門日萬樹梅花放臘前

旅館荒涼十月寒挑燈今夕話盤桓誼關同氣心  
情合謂靈長家大令交到忘年禮數寬同館黎李諸公皆齒長逾倍後

會定須他日有別懷爭奈此時難軟紅明日東華  
路一色停雲兩地看

夜發柏鄉寄同年馬湘門

時猶候  
假都門

金鈴隊隊響郎當五鼓催程過柏鄉夜氣忽深疑  
有雨曉煙初合不分霜心懸馬首歸期緊夢繞  
螭頭客思長獻賦遙知

仙仗外故人雞舌尙含香

朱仙鎮岳廟用趙承旨岳墳韻

故國西風問黍離金牌遺憾慟持危兩宮冰雪孤  
臣夢十載塵沙大將旗輦道有山迷艮嶽虜庭無

路奪焉支長城萬里誰人壞航海空教後日悲

南陽望臥龍岡有懷諸葛武侯

雲霄萬古溯威靈名士瑯琊足典型龍臥已知真  
相國蠶叢猶勝小朝廷三分鼎足悲流水五丈原  
頭泣大星寥落南陽秋雨後一岡天外放空青

襄陽道中卽事

滿眼黃沙澀不開

天兵曾此布風雷土花漸蝕刀邊血野館猶塗劫後灰  
壯士幾年征戰苦將軍多歲總戎才爲言

聖主臨朝日南望旌旗唱凱來

沔陽舟中書懷

小艇瓜皮臥亦斜，推篷隄勢露金沙。  
千林醉態餘楓葉，兩岸秋心上荻花。  
鷗夢欲寒江上月，漁莊多占水邊霞。  
期程一月同先倚，雲際軍山幸未遮。  
十一月八日舟抵長沙時，大人先至一月矣。

大人於六月內遘疾，諸醫束手，有異人與藥，得愈。拜見之下，悲喜交集。是夕蘭亭兄置酒爲歡，感而賦此。

華堂開宴燭高烧，琥珀杯濃話此宵。  
別淚已多疑夢晤，驚魂纔定向波搖。  
刀圭得劑關神祐，斗承

歡託

聖朝慙愧萊衣花五色席邊同展絳雲綃

釋褐日蒙恩賜錦綺

二端敬獻

大人爲吉服

春日隨 大人暨諸友游啟齡寺

踏春不礙石庚庚煙樹叢中一剎清溪水忽深昨

夜雨山光初放此時晴經龍花影翻雲葉茗竈香

風鼻露英喜得趨庭兼縱目非同竹院話浮生

藍田同劉茂才

先正

柳茂才

後選

蕭茂才

伯魁

李

上舍

照軒

小集

連日輕雷送雨聲樹頭今喜挂銅鉦雲收山勢當

窗見風過禽音入座清舊釀宜人斟玉友新旗上  
席品藍英春明最好蓬瀛路騎馬香街憶此情

贈別劉孟遴茂才

得見清標意欲銷劉郎風格本無曹人如濯柳當  
三月技妙穿楊到一毫應有風雲通指顧剛纔煙  
月共爬搔相逢容易成新別愁滴珍珠向小槽  
橋頭河乘小舸往湘鄉

晴朝處處啟雲關放舸清漣第幾灣十里好峰鶯  
館靜半江新水鳴欄閒隄楊帶雨枝全綠林筍經  
風籜已斑自笑桑前三宿戀推篷時望過來山

漣濱書院同陳青江綱夜話

客中無伴覺蕭然誰識今宵對榻眠計共長安凡  
幾載重逢此地想前緣深杯聽雨情難盡古壁挑  
燈夢共然明發扁舟江上路相思一縷寄檣煙

次韻答譚安翁廣文

一瓣應堪拜杜翁文章妙手本空空筆當用處居  
然老詩到工時想必窮靜撫七絃成獨契飽諳三  
味倩誰同紬書今日逢行祕翻使清銜愧大蓬

一身江海客諸侯唱徧伊涼幾處州青鳥何時傳  
口信紅螺有約點牙籌今宵視北三花管明日湘

東一葉舟如許難逢偏易別停雲天末不勝愁  
舟過湘潭

紅暎晃晃躍扶桑侵曉乘流出上湘七級微雲浮  
石埭萬杆新水插牙檣人從漣口分歸路舟指昭  
潭問醉鄉料得家園蒲酒熟榴花消息又端陽

酬鄧梅亭

卓  
豈麓

認得松寮徑未荒環村十里稻花香人多古誼兼  
詩伯酒對今宵盡釀王酬到木瓜愁玉琯聽來鈴  
索憶金堂他時燭翦西窗夜難忘伊人水一方

同友人話舊



颯爽丰神果欲仙殷勤握手記從前壯游新自四  
千里舊事重論十九年別夢依稀懷玉樹長談磊  
落吐金蓮不堪風雨刁騷甚惱亂山齋一夜眠

益陽道中

相風搖曳水舒舒十里停橈一舸徐鄉國漸遙生  
客夢雲山猶在隔吾廬幾家綠樹芳村裏半浦黃  
花返照餘指點忘機是鷗鳥煙波穩占欲輸渠

舟泝湘江

東風一葉趁晴舒曉日清湘畫不如山色忽開帆  
轉處溪聲交送雨飛餘嵐浮遠市煙初合柳放新

衙霧乍梳三十六灣都在眼竹籬閒卻釣人居

長沙別子晉

徘徊幾日鴈同行雲路驚心片影長別去何時聽  
風雨春來有夢繞池塘鋤經合趁三餘富負米仍  
勞百里忙無那布帆分挂處蒼煙寒樹滿瀟湘

子晉回  
安化

寄周靜山師湘潭

秋風金粟散香痕曾荷珠宮擷拾恩燈火十年懷  
舊夢文章千古證宗門官情似水春猶冷經卷如  
山夜自溫想得訟庭花發日幾回霽月倒清樽

記得巴邱繫纜餘登樓趨拜得依於深杯岳雨評  
量後欲雪湖雲飛放初作客連年勞蹇策計程兩  
度誤魚書兩承書召不果赴惓惓又隔天南北路過君山  
定悵如

漢陽後湖散步同王平舫

可權

謝玉峰

隆俊

隄花如火放春煙選勝同來第五泉

酒館名

十里斜

陽芳草路半林微雨綠楊天風和遠送仙人簑水  
滿初通估客船暢好湖山須盡醉呼童莫漫促歸  
鞭

重登黃鶴樓

又趁湖天萬里晴落帆高上武昌城乾坤不老風  
雲色今古長流江漢聲山對鳳皇猶在眼波翻鷗  
鷺舊同盟紅欄十二吟題徧誰識當時振策行

甲子四月杪至院銷假口占

小別蓬山鎮二年銀袍隊記舊游仙

鴻題快靚重楣上

二月初一日 幸院書賜芸館培英額 御駕

鸞輅翻思兩月前繞壁雲霞猶燦爛開軒風日自鮮妍

神舟莫道吹來晚同在城南尺五天

送謝薌泉先生

振定 典試秦中

禪燭輝承瑞錦衙

詔書新下賦皇華曾游澤國龍分節

戊申主試江南

尙憶霜臺

牙觸邪

先生任御史時忤權要落職嘉慶四年起用爲禮部主事

路轉潼關懸

曉日天開華岳擁晴霞遙知駐馬登臨日三朵金

蓮卓筆花

送同年李芝齡

宗昉

典試秦中

玉皇案吏小神仙新捧

鸞書使節懸射策舊曾居甲等乘軒今未及丁年從知

中祕眞天上更說長安近日邊報

國儒生原有事

數文况已靖戈鋌

乙丑四月二十日散館引

見蒙

恩授編修恭紀

神風一瞬判仙凡  
快得蓬瀛穩挂帆  
吉士舊推君子使  
主人新署翰林衙  
鑪煙五色依

香案燈火三年識  
寶函報

國文章猶有事  
儒衣從此凜朝衫

和李北溟學士  
宗瀚秋海棠詩

似與西風訴舊知  
凭欄紅淚一枝枝  
別來春院花如夢  
說到秋情客亦癡  
砌下幽蛩應解恨  
籬邊疎

菊况同時關心昨夜新寒重起向牆陰爲護持

重登岳陽樓

獨步城顛俯若梯危樓高峙岳雲齊秋生水國魚  
龍穩天入湖心日月低遠色坐收空際帆舊痕猶

溼壁間題江山又到銜杯處惆悵梅花小閣西

往歲

同靜山  
師飲此

登彭山

唐高祖子彭王元則曾刺  
澧州後人爲立廟山上

絕巘臨江一綫橫凌空廟貌盡飛甍賢王績懋南

方國介弟符分宗子城遺愛尙教山作姓古碑多

見客題名羊腸踏徧松杉路老樹空庭漏午晴

家靈長

章泗

沒於易州未知旅櫬南歸否哭之以

詩

望望鴻天斷尺書淒涼旅櫬近何如一官纔博空

成夢

時以

萬年吉

地効力議敘知縣八口無歸久寄居應卜松

欹先壠外可憐風雨對牀餘寒宵似聽孤魂泣白  
髮天涯尙倚闌

楊花四首次黃伯良

本賦

韻

幾日吹簫喚賣楊花消息最分明夢回羌笛初  
飛影春去章臺總繫情別院情多嬌掠燕長隄香  
亂緩調鶯憑君拍入湖邊曲莫遂飄零誤此生



綫綫銀塘欲攪春  
悠揚應爲怯粘塵  
三千客路撩鄉思  
十八姑兒幻化身  
淡月渾迷芳草地  
夕陽偏對倚樓人  
鞭絲指點江南北  
萬縷相思畫不真

到眼殘絲綰嫩條  
舊家門巷記何蕭  
寒煙漠漠低雙浦  
遠水濛濛問六朝  
愁緒易添秦女鬢  
落絲猶絆楚宮腰  
年來萍跡渾無定  
怕掠春波向灞橋

輕盈端合植唐宮  
爲底隨塵亂舞空  
去馬有情牽夢雨  
曉鳥無計挽酸風  
一年春事流雲外  
十里歌聲白雪中  
莫向高樓怨銅筵  
惹人容易說頭童

胡京南齋中晤劉伯觀  
淵閱其詩及駢體文歎爲

异才生卽席呈詩有伏櫪自慚逢伯樂買絲曾  
擬繡平原之句作此答之

十載擔簦此地游名山多記舊同儔千言倚馬人  
曾說一卷雕龍今始投刮目遂成新雨契賞心爲  
愛古風流來朝吹簫應難別添出南雲一段愁

同門人黃

生植徐作梅尹應聯蕭自慍楊大有潘

德讓

游水月林

纔試輕衫雪疊羅尋芳一路此經過薄煙已放新  
晴色細雨初添昨夜波出水芙蓉紅似幕亞欄楊  
柳綠成窩湯廚般若從僧乞徙倚亭邊一醉歌

傍郭叢林隱翠微如虬藤蔓挂窗扉池塘水滿蛙  
聲出隄岸花深燕子飛十里煙光都入畫一時風  
詠欲忘歸辨才好似維摩侶汰卻塵心見化機

送史柘溪方伯

積英入京

十年持節楚江邊如水聲名總翕然素髮幾莖身  
尙健丹心午夜夢常懸湖山自載賢人澤雨露終  
邀

聖主憐無那攀留轅下意黯衣風景送梅天

同門人李

如琳黃冠楚周伯升雷承厚楊名燦張

允懷重游水月林用楊生韻

又喚奚奴酒榼攜輕催鐵獺入招提乍添苔色侵  
階亂新長荷花壓檻齊慧果連番參法界香雲舊  
路豁僧谿紗籠最憶題詩處只在垂楊小閣西  
隔岸煙橫柳畫眉別來深綠更垂垂生新活水應  
添畫依舊青山好入詩涼榭同搖蒲裏扇行廚重  
洗樹閒危風泉條聽清音起何必陶情竹與絲  
雨後望彭山

薄雨初過小暑催西山浮爽氣佳哉雲收淡白淩  
空去山擁層青渡水來螺髻遠含新翠合馬蹏曾  
踏亂霞開就中指點高歌處記得前番帶月回

仙眠洲納涼

金鴨灘前水繞洲綠陰深處好維舟萬竿竹密晴

疑雨四面江深夏亦秋居近文山真地主

洲有李羣玉水

竹

眠如巖客是天游

相傳洞賓曾憩此至今暑月無蚊

年來雲臥

甘蔬懶擬向仙人借枕頭

東田別後有詩見寄次韻答之

草堂連日賦歸遲別後依依更有詩風雨一番成

此契湖山他日繫君思出梅恰有新蟬報折柳愁

聽上馬吹屈指征帆將欲挂可能相對再銜卮

戊辰閏五月杪將自澧州歸里留別書院諸子時

將北上

又挂輕帆澧水陽  
非關彈鋏促歸裝  
懷中舊握黃  
金管  
天上仍瞻白玉堂  
手擷叢蘭眞馥郁  
心悲宰  
木已青蒼

先人服闋  
將近一年

君親恩厚無由報  
忍說江湖不廟廊

斑駁一曲唱離歌  
雙淚盈盈眼欲波  
判去情懷同  
繾綣  
從來道義重  
漸摩江山弗忘偕  
游契風雨當  
如遠別何漫道數年林下臥  
家園日少此閒多  
欲別依依話更繇  
抗顏經席已三年  
樹人如木吾  
何敢夢筆生花古有然  
但使在鎔金可鍊應知垂

溜石能穿榜楹數語同須記珍重風流紹昔賢

去歲

題講堂兩楹云臺接囊螢似車武子方稱學者池  
臨洗墨看范希文何等秀才蓋書院本范文正公  
讀書遺址而武子則  
州人也今有囊螢臺

如火安榴兩度新深杯暫對好花辰雀風連日驅  
初暑鴻雪他時證夙因賸有關河牽客夢最憐朋  
友若家人青雲指點高登路軟繡香街共踏春

制義舊稟失去惟友人吳啟富有鈔本求之再三  
始得賦此寄之

平生學藝管窺斑敝帚珍藏手待刪偶過延津疑  
劍化忽驚合浦有珠還煙雲到眼皆陳迹風雨關

心記舊山三篋已亡賴君補一瓶遙送定開顏

曾賓谷廉訪

煥

餞席賦此

詞人一席擬瀛洲小集空齋暑氣收三老筵中參

末座

同席羅慎齋王正亭兩前輩

羣仙隊裏記前修桂花瀉露

宜香飲茅屋談詩久夢游

廉訪有賞雨茅屋詩集

明日扁舟

洞庭路猶將風月望南樓

涵碧亭雅集爲黃文節公生日

涪翁一去七百載大雅不死神爲齡酒熟詩溫尙

吾輩水流花開聞此亭南飛試吟朱頂鶴小檻自

立紅蜻蜓往日大蘇一敵國斯堂我欲名聚星



登大別山

凌空眼界豁蒼茫  
高閣晴川俯漢陽  
九派江聲吞北渚  
兩條山勢鎖南荒  
洲邊有路交鸚鵡  
城上何年集鳳皇  
獨倚欄杆望秋色  
暮雲無際是瀟湘

寄黃謬軒學博

崇正

蒲帆聞汴蒸湘去  
八九峰頭載酒行  
花雨一天依福地  
槐風四座列諸生  
山瞻石廩秋來矗  
江憶茱萸別後清  
應喜鶴田增歲俸  
鈍吟翻笑洛中身

喜聞子晉入縣學

燈花向夕粲如春  
快翦湘波六六鱗  
萬卷相承原

手澤一衿初博此頭巾能持門戶應憐爾畢竟詩  
書不誤人聞喜阿兄翻灑淚九原何處報 雙親

題豆花圖

幽風半幅出簪頭鹿眼籬橫豆角稠紫茁一花煙  
共澹綠扶雙葉雨初收因懷老圃頻呼酒但聽寒  
蛩已是秋往日家園叢客詎短棚宵坐碧雲流

初秋同程編修

贊清

游法源寺

法界城南古刹幽踏沙輕借馬蹏柔萬花天上疑

飛雨一葉庭前忽報秋經閣舊碑書戰壘

寺有念  
經臺

貞觀中征高  
麗塞戰骨處

僧廊小劫悟閻浮臨歸更作同來約

黃菊開時補後游

送劉庶常教五假歸省親

楚中詩客有劉蛻意氣磊落金堂仙馬羣遂空冀  
北野烏私每憶江南天計到家時臘二九上高堂  
壽春八千清湘江邊草色綠得便示我循陔篇

寄懷唐陶山先生

十年鄉國耳才人秋水江南入夢頻作宦一時推  
古直論詩隔世有前身近聞按刻唐六如遺集並修其墓地當湖

海難爲容胸貯周秦不是貧遙羨鯉庭春最早梅

花添放幾枝新

令嗣鏡海庶常時自翰林假省

庚午五月十五日奉

命偕編修

臣

史評典四川鄉試恭紀

丹詔晨飛五鳳樓恭承

嘉命錦江游便攜一劍開雲棧會有雙星向益州聲教  
久通邛笮外文章不薄馬揚儔十年如水初心在  
分作岷峨八月秋

由正定至獲鹿

恒陽西望暮雲屯絲蔓城高近土門滹水千蟠包  
大麓太行一綫走中原關河跌宕開生面風景依  
稀想故園欲訪遺山流寓處荒村無碣認頽垣

出柏井至平定州

落落人家抱驛郵，土門口遠石門頭。微雲度澗疑

爭路驟，雨衝崖欲放流。地據山阿，藩晉國州如斗。

大湧名樓

州有湧雲樓，趙閑閑詩：莫笑儂州如斗，大他州誰有湧雲樓。

來朝七

十二河水

從義井鎮至芹泉驛，回環涉淺，有七十二河之稱。

應惜幃泥拍

浪浮

平陽懷古

紫氣堯都應上躔，漢甥曾此卜郊天。宮門臥豕三

妻豔，汾水觀魚萬燭懸。至竟雄圖歸石勒，浪追尊

號到劉禪。司空送聖人何在，回首青衣一點然。

過涑水橋懷司馬文正公

政府重登髮已宣  
穉郎遺毒一朝湔  
如聞父老呼

生佛久有兒童識  
樂天二等書雖誤  
承祚九分人

未遜伊川

程子謂君實九分人

故山喬木蒼然在  
想得春風

杖屨年

曉發蒲中

連雨衝泥喜放晴  
曉來林柿綠盈盈  
沙邊水嚙岸

牛氣樓上風乾鵲  
雀聲九折河流環  
郡郭四圍山

色聚秋城條南舊  
是詩人宅欲問桃  
花深處行

首陽有夷齊廟問  
之土人多不知惟  
云有二仙廟

蓋流俗沿訛也作詩正之

少陵曾伴杜家姨土地公然祀退之一樣荒唐出  
齊語千年香火誤淫祠如何扣馬餐薇客也說騎  
牛採藥時忠孝神仙竟誰擇回頭一笑首山知  
馬上望華山

潼關西上鬱嵯峨立馬三峰迴若何羣岫冕旒尊  
白帝諸天風雨挾黃河花開玉女盆中見草長仙  
人洞口多擬駕茅龍山頂去青天搔首一高歌  
華州郭汾陽王祠

河山環護尙英風唐室安危一令公將士父兄歌

僕射朝廷婚媾寵元功蓋勳自古能招忌讒賊由  
來勝伏戎等是軍中被徵命金牌不復恨何窮

金氏陂

金陂一望渺悠悠陳跡人猶說敬侯遠樹煙光橫  
駿隼高原沙氣走颼颼驂陪御輦無芒刺畫對甘  
泉有淚流殺卻弄兒延兩綬霍家山禹愧貽謀

灞橋

灞橋兩岸多楊柳直到秋來未肯殘幾許離情添  
漠漠半河新水共漫漫日邊已覺長安近雲際猶  
愁蜀道難差喜能看黃白閣

山名

銷魂不用倚欄杆



秦中懷古十首

鶉首星高紫氣升西來形勝俯澠河山滿目雄  
三輔風雨當年護二陵神啟蒼精追鳥翼圖開王  
會想龍興岐周累世艱難業一笑何緣遂土崩  
啟字將軍溯百蟲隨刊同奠夏王功雄封更闢金  
牛峽大國會歌職駟風誰使商君司法令翻教魏  
冉號孤忠居奇况有邯鄲客太息終南王氣終  
斬木西行起義師拔山豪氣上鬚眉八千子弟縱  
橫日十二金人黯淡時張楚何妨三戶少暴秦惟  
有一灰遺灃川夜夜多情月曾照阿房五丈旗

代北歸時揖讓新天開帝運補皇春  
咨農歲見蠲租賦下士宵猶問鬼神  
未必銅山輸鄧氏原無文繡到夫人  
西來曾指邯鄲道淚灑新豐鼓瑟辰  
小劫昆明認渺茫龍淵廟食尙咸陽  
苦從秦火收煨燼親向明廷策秀良  
直道竟能容汲黯舞文原不赦張湯  
千秋合有南狐筆忍使齊名到始皇  
白玉文開構五梁旋看草付又天王  
名才間世登王猛老將臨壇拜鄧羌  
偶向長江聽風鶴誰知平地起魚羊  
鞭鞘擊股恩恩去枉植梧桐引鳳凰  
彼美聞歌霸氣休轡輿西上水東流  
入懷明水幾

時合山戶楊花同此愁  
賸有舊山環鄴下那無錦  
纜到揚州周隋建國須臾事  
何處青門訪故侯  
手翦羣雄闢草萊  
楊花開盡李花開  
楊裘早識眞  
人氣保鑑全收命世才  
九廟衣冠尊柱下  
百神觴  
豆集靈臺孫兒得寶成  
何用猶費昭陵汗馬來  
家索曾聞呂野鷄  
金輪出世更離奇  
與酣子晉吹  
笙夜膽落賓王草  
檄時幾見忠臣如此獠  
徒能圓  
夢有鸚兒梁公早聽黃臺怨  
不及山人夜詠詩

規模一代說唐家  
誰使諸藩亂似麻  
承露有盤辭  
漢月齊雲無處望  
京華愁生小苑芙蓉地  
春去章

臺楊柳衙咫尺城南韋杜曲古陂空照舊時花

茂陵

阿環青鳥去怱怱回首邱山帶劍同鑿地一池沈  
漢影通天雙掌插雲中當階大隱歌方歇傾國佳  
人瑟未終惆悵茂陵秋草合石麟高臥幾西風

馬嵬坡

縹緲神仙隔十洲人間天上兩悠悠羅衣竟自拋  
山下義髻空教逐水流猶使路人悲錦襪早聞天  
子索纏頭長生殿裏他生誓孤負團圓一片秋

馬新息侯廟

伏波遺廟此山邱  
矍鑠將軍昔白頭  
骨借五花標  
漢闕手將一柱鎮炎洲  
誰從淫潦悲鳶站  
獨使殊方拜馬留  
同是功臣闕近戚  
雲臺無處畫來侯  
征羌侯來歙光武祖姑之子

鳳翔東湖蘇文忠公祠石刻九日一首有憶弟淚  
如雲不散望鄉心與鴈南飛之句讀之悵然有  
懷舍弟子晉輒次原韻書祠壁

東湖亭子好煙樹遙接陳倉古翠微  
秋氣忽從林外至浮雲疑向故鄉飛  
山川入望人俱遠風雨連牀夢久違  
何日卜田如石佛不應猿鵲弄嘲譏

由鳳翔至寶雞

路轉岐山更向西川流汧渭合磻溪地形遙據三  
原上岳色平看二華低廣樂會聞天賜大霸圖猶  
說石鳴雞車麟一代秦風歇斜日空林怪鳥嘯

過寶雞金臺觀有感

張三丰  
嘗隱此

學得周公類蟒蛇可憐孺子遂無家幾年香幣勞  
專使萬里蠻雲失翠華偶託仙人尋邈邈誰知老  
佛已袈裟金臺觀下斜陽路回首西山隔落霞  
棧道坡陀輿前以緯曳之戲作

波濤俯視萬山低幻出輿前錦纜齊  
窅窅影搖蟲

百足登登聲亂馬千甌擎空石磴何妨曲努力丹  
霄竟有梯似此艱難須著腳人間咫尺是雲泥

七夕寄內黃安人

村酒難沽興易消空庭獨坐客心遙明星落落三  
更出好月纖纖一榻邀路阻黃牛徒有堡

是日次黃牛堡

河填烏鵲自成橋人間此夕輸天上香霧雲鬟隔  
寂寥

棧道懷賀耦耕編修

與君京洛分襟日共賦皇華四牡騑我已西來登  
棧閣君應南望近庭闈瀟湘秋好雲三色岳麓屏

開翠四圍不羨鄉人誇畫錦  
羨君行篋有萊衣

登鳳嶺

相傳周文王嘗獵鳥從此集岐上

高高直上五雲鄉  
蟻曲螺旋廿里強  
俯瞰孤城如

出甕仰捫峭壁類循牆  
時平要路無豺虎  
山割窮

崖有鳳凰

山顛有石中空曰鳳凰窩

卻憶岐陽蒐獵日  
那無雄

雉起陳倉

紫柏山張良廟

一擊空驚誤副車  
功人已斷長蛇  
功成忽憶赤

松子石隱來餐黃柏花  
竟有前籌匡漢業  
那無片

土屬韓家王孫亦是先朝裔  
悔殺當時躡足差



留壩寄懷嚴樂園太守

如煜

嶺指柴關勒馬過興元南望渺如何山形早控三  
巴險奇氣遙分二酉多花雨朝浮崖上翠墨雲秋  
寫石邊螺使君按部能來否絕壁題詩不用磨

出畫眉關

重關不放大溪流峭壁排空下石頭一綫忽開雲  
壑路半山飛濺雪花毬離離隔澗聞鶯語隱隱層  
崖見鹿游誰拔屏顏天外去平看秋色度金牛  
沔縣謁諸葛武侯祠

參天一徑繞蒼松丞相祠堂此路逢司馬當年惟

畏虎先生少日已猶龍音含徵角琴邊石

祠有諸葛石琴

影矗旌旗戶外峰恍惚風流存羽扇宗臣氣度自

春容

奔走頻年智力殫忍教王業付偏安  
丞嘗屢下嚮民淚風雨猶寒上將壇心寄古時聊管樂恩流法外豈申韓  
千秋公論存詩史隻眼能將伊呂看

卻聘當時識不羣紛紛狐媚漫三分  
能從亂世收名士畢竟英雄只使君  
魚水天開炎統日龍蛇秋護陣圖雲  
漢官尙有威儀在可許南陽獨策勲

沔水湯湯石浪龐依然流恨似雙巫  
妖言眞見蒼

天死遺命空傳白帝孤但識攻心操勝筭漫教讐  
國託嘉謨乃公基業譙周盡怪得當初罵腐儒

沔縣道中聞嚴樂園太守至

茱萸江上竹籬居記得兒時逐客車夜雨共尋園

內韭春風曾讀別來書五丁峽偏新探險

時自寧羌勘災

過

此二西山深舊結廬

太守辰州人

猶有同舟佳詠在翦

燈重乞付鈔胥

先生有舟中贈先君詩久佚其棄前有書屬其鈔寄

發昭化縣

葭萌一日小勾留喜得今朝雨氣收怪石斷斷當

馬首青山滾滾上牛頭

山名

南瞻劍閣秋如畫東折

嘉陵水自流一笑天雄關名非險要古來蠻觸幾其  
侯

有夢哭周氏亡妹

妹卒於去秋  
余今夏始知

打包雲棧過來身骨肉迢迢入夢新一死竟成終  
古恨四年曾是未亡人占熊弗遂生前兆負螺誰  
聯沒後因苦殺周郎重晤日泉臺迎問老孀親

茫茫天意竟誰知似爾聰明早喪之四歲無家稱

幼婦

先慈見背時妹  
甫四歲即適周氏

十年作苦伴孤兒

妹夫周  
光炯幼

孤鮮

兄弟那堪遠道悲秋日正是江干送別時

戊辰秋  
攜眷入

都與妹  
泣別

夢裏隱聞阿嫂哭

是夜夢內  
子同哭

楚天南望淚

如絲

姜伯約祠

北伐連年戰鬪勞紛紛被敕倒旌旄猶聞死後將  
軍膽空拔營中壯士刀往事竟成蛇畫足天心已  
定馬同槽當歸遠志皆虛願歲歲祠前劍水號

縣州

路繞連雲古棧通芙蓉溪上臥長虹萬重山色開  
縣左十二增城接閩中瓦鼓聲邊飛白雨腰鎌影  
裏送西風故鄉兩度秋光好卻憶村南早稻紅

縣州弔張魏公

半壁臨安已不支  
富平新敗又符離  
少年入幕憐才子  
殘局同朝誤太師  
海內每聞諸葛號  
陣前猶卓曲端旗  
將軍脫幘長城壞  
孤負黃龍痛飲期

漢州

天漢遙遙度客槎  
名州新入得雄誇  
人家占斷三分竹  
牆角開殘一捻花  
官路橫當金鴈近  
長橋隱臥石犀斜  
成都屈指還三驛  
搔首風前鬢有華

新都弔楊升庵先生

朝內何人念敬皇  
滇南回首暮煙蒼  
山迷故國三千里  
夢斷中庸十八章  
升庵生時母夢神送五代忠臣夏魯奇至曰武臣也

以中府十  
八章輔之  
賈誼少能憂漢室  
虞翻老尚棄蠻荒  
白頭粉面雙丫髻  
起舞汎瀾淚數行

初入成都

望中城郭出遙青  
鞬矢紛紛候驛亭  
我愧林宗乘薄笨  
人傳李邵識天星  
旌旗宛向雲邊立  
鼓吹疑從月裏聽  
卻笑當年渴司馬  
空將駟馬耀鄉庭

蜀闌卽事

梨花簾漾水盈盈  
白玉壺開滿座清  
五夜人方占氣象  
十年我已忝科名  
敢云相士追前輩  
竊恐論交負老成  
向夕不辭披校瘁  
期將敬慎答持衡

朱衣底事叩因緣如秤心原一寸懸座上何人尊

北斗古來才子盛西川文翁教化今猶在高朕風

流昔所傳同此鈞天觀雅樂莫教真賞誤條絃書藝

首題樂則

韶舞故云

花樣新拈繡度金一篇一字費沈吟龍身具采寧

韜匿雞肋難拋更酌斟落卷經三四過猶挾以漫上堂同事頗笑予雞肋

說匠門無棄物出來公道在人心回思執卷趨庭

日紅燭燒殘淚不禁先君十應鄉試屢薦未售

照乘珠璣字幾行輝輝鼉采夜主光眼明合倩金

鑰刮材大何須玉尺量早識功名關事業卽論科



第有文章殷勤樹木無多祝認取他年作棟梁

明府胡竹塘

光瓚

壘瀛橋

仕達

賀霖圃

懋椿

邀游

丞相祠堂遂謁惠陵晚歸有作

良辰相約出龜城六對青山馬上橫人是無多皆

舊雨

三君皆余同郡

天如有意放新晴撫時好遂登臨樂

懷古難將感慨平勲業三分何處問西風倚檻不

勝情

惠陵

一坏黃土秋陵增竹子夾道青棱棱有蜀以來此

真帝使君而後無漢陵垂老英雄惜髀肉當時將

佐如股肱丞相祠堂好松柏歲時伏臘同豆登

重陽後一日同年司樂齋

爲善

劉鈞台

德銓

賴梅

林華鍾

王驪泉

崇本

李琪園

嘉祐

卓海帆

秉恬

約爲城外之游遂自萬里橋經百花潭至浣花

草堂賦此

臨流取次引清觴難得同年此一方看竹何妨留

半日插花原不定重陽地經雨後添新翠人喜風

流拾古香他日草堂修故事記予連坐水邊廊

成都登白堦作

提封四面阻巖疆鼎足中原此一方國入蠶叢橫

地軸路從牛後破天荒山川赤帝神靈業旗鼓青  
衣割據場搔首錦城秋色外疏林幾處是斜陽  
紛紛佳麗話前灰如此江山亦壯哉羽扇尙留名  
士氣酒壚曾識美人才曲傳絲管秋爭咽句譜煙  
花古易哀惆悵遨頭尋樂盡洲邊不見舊樓臺  
羣山開出玉芙蓉到眼秋光淡不封氏道昔聞通  
白馬賓夷今尙約黃龍雲平相國千盤路雪繞仙  
人八面峰試向籌邊樓上望年來萬竈久銷烽  
燈下讀曹能始蜀通鑑詩意有未盡拈筆續之凡

得詩八首

芒芒啟土溯開明舊治青衣最有名  
鵲語無聲望帝龍歸有曲悼山精  
曾隨周主圖王會早與商賢宅老彭  
何許張騫能鑿空浪傳修築始龜城

河山百二狎秦中棧道燒開士欲東  
炎鼎誰成高帝業渝歌先唱大王風  
休嗟後代三分蹟猶是當關百戰功  
看到漢家終始處巴賓雖遠路須通

成家亦制竟無成太息公孫此戰爭  
天子書來分

帝號

光武遺述書署曰公孫皇帝

故人歸去贈蛙名幾教吳漢

驚生虜能使隗囂備列卿千古背城誰死國咸門

一戰氣縱橫

劍門雙闕聳呼嶸箕踞氏王歎息聲四姓獨推丹  
穴種一歧南澈赤虹精竿橋進鼓終歸命犇水乘  
潮枉弄兵羅尚乘牛犇水征  
李雄見水經注亦有西山能讓國笑  
他充隱范長生

玉壘城高接斗杓長安誰道此間遙鈴聲曉度三  
郎曲鞭影秋懸萬里橋早對明星傳耳語拚將卻  
月寫眉梢歸途賺得嘉陵景付與吳生著色描

決雲軍幟紫氍毹王八西來虎視眈阿父何堪問

田十尊兄猶足長朱三

梁使書來稱  
建八兄皇帝

妝窺玉女神

先告識報金牀德已慙不記都頭隨駕日御袍和

淚灑煙嵐

畫羅裊好襯雲霞一曲甘州帝念家錦帳初移星  
作輦玉簫親按月爲槎嘉王臨酒悲無限狎客登  
筵燭未斜銷歇青城王氣盡夜闌空學後庭花

圖中省識舊張仙毬馬公然意氣翩解念脂膏銘  
戒石還因蟋蟀重桑田芙蓉花老城猶在錦繡衾  
寒夢自圓可惜梅龍零落後但聞高髻學朝天

眉州蘇文忠公故宅

玻璃

江名

一色水平鋪晚泊江干訪大蘇風月猶憐

陳跡在湖山誰道故鄉無

東坡杭州詩故鄉無此好湖山前生法

果參諸佛半世才名誤老夫迢遞小峨眉畔路春  
來不聽子規呼

曉發眉州至青神

木蘭艇子撥殘星江上清風郭外亭漸覺蟆頤山

山名

成淡遠遙看象耳

山名

入空冥好山似此眉應白秋

水無多眼亦青暢好詩情須酒酌擬從坡老乞餘

靈

游嘉定泌水院

松寮一徑綠煙開半日叢談此撥灰風引泉聲穿  
牖入雲移山色過江來追陪頗愜同游趣翦葺曾

勞太守才

宋太守鳴琦重葺

一事臨歧須致語丁東院落

久蒿萊

同松軒編修徐司馬

廷鉉

暨縣令許王何李四君

### 游凌雲山

眞向凌雲載酒游扁舟同問大江秋  
支空山骨鑿成路殷地濤聲飛上樓  
崖下尙存千億佛座中小集五諸侯  
山川有此供清嘯合號西南第一州  
天然畫裏著沈犀競秀亭空望未迷  
秋色遠將三水下夕陽斜抹九峰西  
池傳坡老雲常在山寫峨眉翠與齊  
列炬恩恩應惜別筠廊何日手重題



晚泊杜家場

小作華陽汗漫游東來三日住嘉州開船伐鼓聲  
何促著屐登山興未休十里秋光闌白塢一峰寒  
色上烏尤竹公溪畔瀟瀟雨添送來朝下瀨舟

自嘉州至犍爲

丹崖紅樹望迷離十月平羌下峽時江走金沙橫  
佛腳天開玉雪豎蛾眉淒淒猿語長楓路歷歷人  
家短竹籬直過嘉州三百里青山處處可題詩

敘州飲荔支酒憶山谷詩白髮永無懷橘日六年  
招帳荔支紅愴然成詩

涪翁昔歲戎州住六度江邊見荔支永憶陸郎懷

橘日難勝杜老擘紅時

杜甫宴戎州東樓詩重碧醅春酒輕紅擘荔支

雲

封邊臘香千縷雪翦峨眉水一卮我是鮮民今廿載不堪揮淚讀公詩

曉發合江縣望少岷山

青城三十六峰色我未登之夢想殷忽覩少岷真

岷岷如游大面

岷山名

亦欣欣一聲孤櫂下殘月幾

處斷岩升白雲向晚江津定回首望暉樓遠隔斜

曛

泊重慶

江流三面繞嶙峋  
龍虎門高字水濱  
石是一磐曳  
龜尾塵將萬瓦次  
魚鱗山川自昔雄  
巴峽風俗於  
今半楚人何處渝  
歌中夜發竹枝聲  
古調翻新  
舟過忠州懷白香山

水落涪魚石點霜  
輕舟曉發四人鄉

涪州有四人  
之稱謂華人

巴人廩君槃瓠  
也見吳船錄

竹郎祠遠浮秋色  
蔓子城空下夕

陽當日才名推刺  
史臨風高唱會巴  
娘荒臺何處  
尋遺跡江北江南  
樹影蒼

曉發萬縣

萬壑千巖屹水濱  
如花如火望中新  
便疑一葉江

邊路已是三山海上身月到西巖猶有夢地經南  
浦易移神凌晨起花雲安去更試醺人麴米春  
雨後望下崖

一噴一醒懸泉霑千峰萬峰如倒瓢嵌空奇石側  
成屋度欄老松彎作橋秋氣入林白日靜夕陽在  
山紅樹嬌無因舉手招仙客洞口冷雲深寂寥

同松軒編修鄧東嵐太守

燠

譚鐵簫通判

光祜

登

### 白帝城

拍馬西風得得來夔門險處立崔嵬蒼煙紅樹不  
知暮赤甲白鹽相向開未暇荒涼尋漢殿且憑談

笑上高臺古今何限東流水付與樽前酒一杯

子陽城

雄關如戶屹崢嶸白帝山高舊有名漢貨竟符牛  
腹識燂聲曾破虎牙兵亦知子系無多祚合遣圭  
蟲號此城卻憶長驅夷道日不聞一卒阻岑彭

曉過瞿塘

望華亭畔淨煙蕪櫂響瞿塘下舳艫一石捍流橫  
馬象雙門排險扼魚鳧溪聲近合東西瀼山色遙  
連大小巫誰與高唐報神女早來迎客有檣烏  
曉發巫山望十二峰

神女廟前朝叩舷高唐觀上綠浮煙七千遠道歲  
將暮十二好峰秋更妍爲雨爲雲殊窈窕聽風聽  
水奈纏絲巴東兩岸猿聲合何處相思不可憐

屈沱題三閭大夫廟

三戶依稀見楚民左徒遺廟枕江濱薜蘿夜月號  
山鬼蘭芷秋風怨美人至竟蛾眉難悟主可憐魚  
腹去藏身女嬃砧下灘聲急鳴咽千年水不春

秭歸夜泊

江天迢遞暮雲垂小泊歸舟落木時客夢尙懸巴  
子國鄉歌初聽楚人辭雪霏燕樹春前絮煙綰園

花別後枝萬里香溪今夜月一家三處說相思

時妻

李皆住京邸

舍弟在安化

自平善壩出南津關

卽下牢關

誰將平善錫嘉名路指牢關儼似城雙眼忽開知

峽斷一波初起覺潮生低回檣燕傳消息拜舞江

豚解送迎

至關時見之

稍怪榜人催客急游仙不及洞

中行

聞三游洞有劉姓湖南永州人坐石龕中不食三十年矣氣息如故擬登岸往訪之未果

夜宿宜昌

萬疊雲峰掩蜀山彝陵東望峙雄關樓開楚塞聞

清角險出刀州唱大鑲古月自懸三國戍暮煙遙

接五溪蠻江流向夜西風緊猶似猿嘯白帝間

自松滋至太平口

松滋隄柳半毵毵打槳過來影一潭隔浦煙光沈  
夕照遠天帆勢出晴嵐黃牛峽落秋先老青草湖  
寬水尙渰獨有鄉心如木葉隨風吹向洞庭南

江陵別友人

幾日船頭話翠微荆臺臨別尙依依楚山秋冷堆  
紅葉巫峽雲深隔夕暉一篷風邊人共遠片帆江  
上夢同歸知君到日應回首十月瀟湘鴈北飛  
江陵夜泊有懷羨周洞崖兩伯父暨蘭江從兄子



晉弟時方登陸北上也

遠道風花蜀國絃

漁洋句

蒲帆初卸楚雲邊  
三秋鴻

鴈多鄉思一夕魚龍攪客眠  
望望京華依北斗  
濛

濛浦漱下南船翻疑萬里巴  
山近咫尺家園隔一

天

峴山羊公廟

豐碑高屹漢江邊  
尙憶輕裘緩帶年  
遺愛南陽思

召父風流東國仰  
顏淵人雖異地能知感  
賓得同

游亦自賢一樣登高生慨歎  
牛山揮淚有誰憐

渡河西望有懷洪介亭編修

時主試  
陝甘

天外三峰雨洗秋華陰騎馬昨曾游君來正及涼  
風候歸日應登最上頭少室晚煙通紫閣中條晴  
翠寫黃流何當更駕茅龍去縱目雲間太白樓  
湯陰謁岳忠武祠

十年汗血儼長城眞見壺漿夾道迎隔代

君臣猶有淚

祠內敬沙  
純皇帝御製詩章

當時父子竟無情南來但

遣通祈使北向終孤義勇兵此日故鄉祠宇在蕭  
蕭風雨颯寒旌

正定過趙順平侯故里

儒將居然智勇沈中興何止接饒岑行軍早拓姜

維瞻討賊原同葛亮心臨難知材推故友先幾擇  
木偶良禽歸耕獨惜無桑梓長憶驃姚淚不禁

忠義同扶漢業昌曾聞手戟擲先皇虎威合上將  
軍號龍種親提孺子王史紀功名配滕灌天留老  
宿後關張平生頗恨街亭役不遣將軍代幼常

送同年邱南屏樹棠之官江南

十年人海重英豪公望欣占彙拔茅時自刑部以知府銜隨勒

制軍往此去桑田麾鹿轂邇來棘府有烏巢白門山

近春應早黃鶴樓高夢易交欲話離情重回首燭

花曾記隔簾敲壬戌會試與南屏同號

接待寺懷劉戡山先生和賀五耦耕作

年譜載公  
崇禎十六

年以疏救熊開元姜采罷都御史寓此幅巾野  
服讀易不輟與吳騰微劉理順過從講學凡六  
月始從潞  
河歸里

又見恩恩脫牙簪故鄉秋思渺山陰老來擬注涪  
州易夢裏曾爲信國吟一代人才銷詔獄何時黨  
論息東林幅巾野服歸來日未了平生殉主心

如此孤雛視諫官老臣辭闕尙流連經橫古寺零  
秋雨人去空堂賸夕煙幾輩廟堂登圯族片時講  
席得諸賢不堪再起南都日重聽風流燕子箋

送蔡琢軒

世瑛

之官雲南

萬里溟雲叱馭過看山層疊道牂柯秋生楚澈孤  
舟遠天入蠻江舊雨多同年彭兩峯郭瓊浦皆令滇中嶺外刺桐  
宜對酒郊邊燕麥待聞歌昆明池上他時月可許  
分來照薜蘿

季壽赴官石樓臨行有詩留別次韻贈之

七載南轅還北轍一樽重對別愁新如君作吏官  
隨俗自古能詩多食貧樓閣秋橫山上石池塘春

老夢中人相思待訊汾雲邈此去關河近古綸

博物

志以汾陰

爲古綸

兒春福殤一月矣痛之未能自己偶檢案上書得

歸震川集有小札云父子之情已矣祇此雙淚  
爲吾兒也又欲自禁耶讀之酸鼻知舐犢之愛  
人情類然曾子之責子夏殆猶局外人言耳流  
涕之餘復作二詩以自解

半載與兒爲父子桐棺一月家中身每當獨坐成  
追憶時有形容入笑嚙灑淚情難忘我輩返魂香  
欲覓神人徐卿第二雛應好何日重來慰眼新

騶唱驚傳紫鳳車誰將妖夢幻杯蛇

兒生之夕家人馬升夢騶

從甚衆擁一官輿至門前投刺去  
磬聲轟然驚悸而寤咸謂佳兆

盤陀欲問三生

石

盤陀石在梓潼七曲山予去歲過之  
因祈嗣文昌神前見時甫姪兩月餘  
優鉢虛憐

一現花尚記鄉人誇舉解

兄以正月十一日巳刻  
主是日湖廣同鄉會

子適絲

忍看小姊泣遺紗

前日曝兒衣次女瓊姿  
甫十歲倚衣架涕泣不

理其事  
已兒生母與其嫡  
見之遂至放聲

西河有恨吾何敢餐飯爲兒強

自加

送賀柘農

熙齡  
南歸

往來酒盞與詩筒人海才名二妙同富貴他時應

不免文章落第尙能雄山橫馬上千家月秋老亭

邊一篷風君過洞庭湖水闊爲予先訪釣魚翁

秋桐

一夜西風徵變商桐生非復舊朝陽花時倘及春

三白夢裏俄驚月半黃金井有聲催蟋蟀玉階無  
影失鸞凰當初虎子親栽植回首星星鬢已霜  
十番曾映小紅樓瞥眼風枝漫打頭彈入七絲應  
有恨飛來一葉便成秋刻魚鼓響音還在噉鳳聲  
高羽尙留好待乳巢重結日石欄點筆坐消愁  
讀李北溟宗丞衡山吟卻和

家居我本湘西澳不到衡山只夢游忽睹新詩真  
面出渾疑滿紙碧雲流芙蓉九曲天邊雨鸞鶴三  
山海上秋想見霧車風馬外李侯揮筆鬼神愁

送王生

懷曾懷孟

兄弟歸蜀



公車一載滯春明  
憐爾今爲歲晏行  
萬里歸鞍風雪緊  
半肩行李水雲輕  
從來西蜀多才俊  
當日東坡亦弟兄  
我昨玻璃江上過  
門開紗縠獨崢嶸  
送裴芥舟游越次留別韻

六出花飛雪碾輪  
天街走馬淨微塵  
游能吳越何妨遠  
囊有湖山已不貧  
楊柳漫橫關上曲  
芙蓉遙待鏡中人  
相思權返春江日  
樽酒煩君起舞頻  
黎環齋寄詩見懷集蘇詩一律答之

與君相從非一日  
最憐嗜酒謫仙人  
或云靈境歸賢者  
何處溪山非此身  
但令文字還照世  
試拈詩

筆已如神錦囊玉軸來無趾長羨鄒枚接長卿

余既集蘇句酬環齋因憶劉伯觀與之居近倡和  
必多復集一詩寄伯觀

寒燈相向記疇昔玉堂花蕊爲誰春卻想山川常  
在夢試拈詩筆已如神厭伴老儒烹瓠葉天教閒  
客管青春詩成送與劉夫子知向江湖拜散人

送林虛亭之官廣昌

時以便道  
歸省巴陵

意氣元龍尙豁然岳陽樓上挾飛仙十年萍跡憐  
同氣三月花場記舊緣雪色曉浮燕市酒煙波春  
上洞庭船遙知錦綵登堂日早有香風百里傳

送董眉伯之官大庾

會聞庾嶺梅花國董子爲官今得之好語臨行休  
惜別幾生修到此吟詩雪消燕市騎驢日雲繞孤  
山夢鶴時料得書來憑驛使北枝多少遶南枝

壬申元日有

旨上年除夕祥雲密布豫報豐年之瑞推恩敷闔子朝  
賀諸臣各加一級恭紀

玉雪霏霏萬絮飄人間協氣應鈞韶先期已報年  
豐稔望歲應酬

帝旰宵

先是以雪澤稀少除夕前  
數日上新雪宮中

元老晉階榮黼黻

是日

恩旨以大學士慶桂董誥贊襄機務勦平教匪上年會  
加太子太師銜至是遂賞加太保銜尤異數也  
諸王拜

賜荷瓊瑤

儀親王成親王慶郡王各賞銀四千兩定親

王榮郡王各三千兩且

以普爾番加秩因膝六

庚午元旦雪蒙命各分賞其下

春祺  
衙署一條

恩紀錄二次

稱得冰

送歐陽鍾廬

僑

之官羅城

又酌葡萄曉陌寒回頭紅日是長安同年有幾神  
相照後會雖多別較難五嶺雲邊分客路一星柳  
外認郎官知君囊內琴弦在博得蠻歌對月彈

送劉葵圃

開誠

之官樂安

好友重逢別較難  
離亭暫此話盤桓  
殷渠孔井平生志  
楚岫吳峰幾面看  
百里官推新令尹  
十年人識舊儒冠  
知君雅有弦歌趣  
稱得佳名是樂安

送楊剛亭侍御

健

出守廉州

僦屋西街此卜鄰

余居永光寺西街相距甚密

連年風雨共蕭

晨卻看五馬馳新使  
曾笑三烏避要人  
遠別情增諸友戀  
長才分作萬家春  
南來儻及衡陽鴈  
莫吝雲邊尺素頻

同唐鏡海賀耦耕兩太史游昆明湖

萬頃湖波接上台

御園風景卽蓬萊  
喬雲曉漾三壺迴  
德水秋澄一鏡開  
幾點銀青浮島嶼  
數重金碧護樓臺  
嘉游快遂乘  
鼇輿出入

恩光許共來

連畦風送稻花香  
領得

恩波此日長  
豈有戰船勞武帝  
端宜靈沼詠文王  
橋邊  
玉螭垂秋影  
隄畔金牛臥夕陽  
隄東銅牛一  
乾隆  
是

飛龍

乾隆  
御舟名

親御處百年遺碣感

先皇

陛下有碑恭勒

高宗御製詩

送趙笛樓給諫

慎珍

分巡惠潮嘉道

朱幡迢遞指番禺使者觀風入計敷鄉路恰宜通

楚粵

時以便道乞假還里

宦游難得近韓蘇三州負弩迎新

節衆器兼身想大儒領取詩書期有用

聖恩褒諭許馳驅

粵洋比歲戢么麼南顧猶煩

睿慮多尙想指揮用龔遂非關薦達仗常何暇待好整

翻成速寬處能嚴不在苛安得人間百子駿與公

一路靖鯨波

尚憶南臺歷級登手操霜簡肅丰稜上書屢乙三  
千牘得士曾推一二八升諸葛竒才能謹慎李公風  
度最端凝

紫垣佳話憑誰續後日夔龍是股肱

立雪高風湖道真一編持贈見情親

臨行以宋楊龜山先生全

集見

贈十年館閣尊前輩百里鄉關認舊鄰  
芄黍陰

滋南國雨桃花漲合武陵春他時善德山前路杖

履隨公訪釣人

雪意和鏡海

向夜檐風料峭生天公作意試飛瓊離離去鴈疏



無影點點歸鴉暝有聲寒到長安驚歲晚夢同小  
院覺衣輕蕭齋風味雙甌在好好安排活火烹  
一枝筇杖倚瑤空輕重閒雲色相同忽見巖邊山  
悄悄因懷江上水漾漾林深欲黯梅花月院靜初  
交柳絮風往日灞橋尋句地待呼村酒載奚童

雪霽喜廖韻樓

敦行 見過

六花連日散輕盈失喜晨檐雀噪晴經病始知身  
貴重忍寒將奈歲崢嶸牀頭五斗難療渴肘後千  
金缺養生賴有雄談追草檄愈風爲起氣縱橫

送李次卿

仲昭

歸廣東

豸衣新換釣魚竿人去珠江十月寒自古高才妨  
絳灌此邦遷客有蘇韓梅花嶺上傳消息萱草堂  
前博笑歡他日公車徵李固五雲回首卽長安

送李贊善

宗昉

督學貴州

萬里巖疆擁傳過土風親問古牂柯秋辭

闕下纏綿遠山入蠻中突兀多干羽久敷南國化簡  
書不唱北山歌澧蘭沅芷經行處歸夢因君到薜

蘿

送朱侍講

士彥

督學湖南

輶軒銜

命四同年

謂諫齋與顧南雅  
葛樺香李芝齡

送子南行倍眷然遠道相

看雙短鬢故鄉遙隔一湖天  
文章典則循先正山水逢迎想夙緣  
有約明春黃鵠浦羽衣吹笛大江

前

擬明歲乞  
假南歸

秋日懷古八首

蕭蕭木葉送新寒長歛秋來手自彈  
便擬挂冠充隱士虛聞襜褕有郎官  
疏閒隊裏栖身易浪泊場中著腳難  
痛哭賈生雙眼淚祇緣無策報治安

隱几青山入夢中一天雲樹攬西風  
路深荊棘愁狼跋水遠江湖藉鴈通  
保障何人師尹鐸關門幾

歲借萊公避賢樂聖非吾事聊復消閒仗酒功  
中庸原合到公卿偏是逢災福倍生漫說紅羊關  
劫數忍看赤子弄刀兵茂宏養晦多長策夷甫登  
朝少宦情稍喜秋來羣鳥息橋頭不聽杜鵑聲  
呼嶸鳳閣與龍樓高處誰容汗漫游豈有將軍皆  
負腹由來上客必焦頭撫時每濺鮫人淚倚柱空  
懷漆室憂煙視媚行新婦例敢呼蕉火致羣咻  
置臣歲歲報偏災誰送監門畫本來野外食經綸  
藿蓼村邊柵料補蒿萊傳聞轉運資劉晏何日籌  
糈得趙開向晚支筇殘照外黃金空峙古燕臺

羽書飛捷按郵程  
鼙鼓譟騰一騎輕  
但得可人能辦賊  
何妨豎子遂成名  
沙場裹革思前事  
中夜聞雞豈惡聲  
賀客紛紛推子玉  
底須爲賈浪談兵  
金隄如帶斷虹前  
問訊茨防一慨然  
楊柳幾株欹汴岸  
桃花三汎滯吳船  
河渠合檢冬官籍  
丁壯誰輸少府錢  
卻憶老謀翟方進  
徒令黃鵠怨年年  
東華十載軟紅塵  
水竹江鄉憶舊鄰  
人似浣花悲弟妹  
路逢荷蓀論君臣  
侏儒玩世猶干祿  
詞客經秋易愴神  
值此登高好時節  
籬邊孤負幾頭巾

送吳同年

超

之官樂陵

河山東國近

神京不盡深期在此行極目風塵猶帶甲關心煙舍  
久呼庚徵求卽恐勞民力撫字何由答

聖明第一吳公推治行到時須訪洛陽生

次韻答周實夫見寄

自笑門前雀可羅一官匏繫忘蹉跎酒逢俠客談  
偏劇詩到窮年債尙多未免因人歸計滯誰能堪  
此別離何春來賸有還鄉約煙雨湘山淡墨和

恭繕

御製詩二集進呈蒙

恩賞表裏二端敬紀

帝錦新披麗七襄五雲天上拜龍章  
曳裾忽煥班聯色  
載筆親承

翰墨光永念衮衣關席職翻憐鐵甲尙戎行  
桑郊未靖  
多鶉結愧捧紅綾到玉堂

奉贈李小松前輩

鈞簡

人海聲名四十年文章道德掩前賢  
獨追古直千  
秋上黜卽元精一畫先

時方  
注易

去國每添新白髮傳

家猶疊舊青氍東山夙繫蒼生望  
肯許高齋抱膝

眠

送朱編修榮出守瓊州

春袍如草綠盈盈聽到陽關第一聲

天子知人超舊格

編檢俸次入前二十名始外放君以二十三名得之異數也

書生

報

國在茲行年來嶺海多名宦

制府蔣公礪堂撫軍董公觀橋皆海內人望

幾處樓船息甲兵一語憑君通問訊相逢楚客話

離情

謂笛樓剛亭諸先生

甲戌三月初四日蒙

恩擢江南道監察御史恭紀

冰衙十載重清班要秩新彈獬豸冠豈有奇才酬



聖主翻因

特擢動朝端

引

第二蒙

見時謝名次

特擢捫心未敢違初願稱

職原難是此官欲報

鴻恩持底事中宵輾轉漸聲殘

楊介坪前輩

嶧會

夢人餽以盤桃解者謂爲桃李

公門之象已而會試果得分校入闈籤掣第十

八房乃悟桃字十八兆也伯昂少蘭爲作圖同

人各賦詩紀之

瑣闥深處拜

恩重

先生三

消息傳來向夜鐘慧識早登羅漢果吉祥

膺分校

如報大夫松色分綾餅紅猶繞賚比鹽梅翠尙封  
好與登瀛添故事公門化雨及春濃

三月廿五日闔三場試卷甫畢而疾作重簾之隔  
藥物多不應時賴朱虹舫前輩日爲診治唐鏡  
海太史朝夕護視可感也作詩以謝

滿天花雨散霏霏

病目所見如是

轉眼迷離百態非異事

異情來不速同年

虹舫先生同舉庚申

同歲

鏡海同戊戌生

此相依

居連比舍交尤洽誼視諸昆意入微漫道瞽災仍  
有幸不然誰與致苓蓀

四月初八日闔中病起

次日出榜

輕陰連日放晴和曉起披衣發嘯歌出戶忽驚新  
翠合滿階猶惜落花多離離風雨關心劇草草煙  
雲瞥眼過文字未忘慚結習漫教人笑病維摩

送同年王半塘評之官浙江時偕令兄采軒大令  
訪同行

連番風雨淨塵沙共載仍乘薄笨車歸去東人獨

杼柚便道回  
山東到時南國長桑麻弟兄相愛資同氣

兒女何知託作家小女瓊姿近有割抗療母  
事采軒數詣問特爲作傳病後

未能歌折柳詩成聊復擬皇考

出闈次日疾復大作臥牀二十餘日矣張少伊刺

史學程

獨卹其乏且屬勿使子知其意良摯不

能卻也報以一詩

瘦骨繩牀強自支可堪新愈更焦思貧非病也今  
偏異涅不緇乎子所知誼重竟忘辭受迹交深原  
視急難時憑君莫話胡奴米古道公然再見斯  
連日病退喜而有作

病來沈重似山傾病去山開四體輕忽憶往常如  
隔世方知此後是重生妻孥驚定形容改神鬼償  
還宿孽清一事比前差覺勝銷磨豪氣近和平

送楊飛泉

鶴書

之官浙江

舊雨情多十四年

飛泉同舉庚申

送君秋泛浙江船地當

湖海增詩思路近鄉關當錦旋

君籍甌寧

經濟卽今徵

學問科名從古重材賢驪歌不盡臨風意清白家

聲自昔傳

次韻答劉春臺比部

教五

病中見寄

空階一雨嫩涼初詩翰傳來隔巷居病骨支秋似

驚馬鄉心催夢到鱸魚貧緣謝客身多暇熱不因

人意自虛賺得扁門成上策繩牀臥對樹扶疏

文章無力學黃初奈此長安不易居病後猶憐身

似燕秋來况已食無魚徘徊赤壁歌明月消渴文

園賦子虛賴有故人能慰我高吟不放酒懷疏

送翟生榕回澧州兼寄書院諸舊好

送子臨歧不自持舊游回首憶當時彭山木落秋  
通屐澹浦雲開夜賦詩路遠難教書札及天寒殊  
有故人思君歸儻向書樓過爲問婆婆桂樹枝

送歐陽坦齋御史厚均乞假省親

一笛離亭雨似煙客程遙指楚雲邊天連水國三  
千路人話家山十六年試職誰無皇甫姆循陔今  
有白華篇羨君鼓櫂梅花岸正及春杯小臘前  
題芳藥圖卷應李子佩

溫溫玉色自精神畫出揚州一段春月下低徊宜

對酒風邊佇立正懷人鼠姑豔漫爭新賞

芍藥見於五經

牡丹特其一種唐宋時

始出而名反駕出其上鶯栗嬌難學後塵

花譜以鶯栗蜀

葵爲芍藥之婢

暢好豐臺消息近試憑香夢問花身

乙亥元旦朝賀恭紀

瑞日曛曛上九霄曉隨鵲鷺覲

皇堯寒鳥戀

主翔金闕新柳扶人過玉橋袖染天香煙乍綰袍分春

色雪初消

微臣

侍立

螭坳下拜舞綏豐樂歲朝

翦燈話雨圖為汪澣雲侍御梅鼎作

小別書齋歲月更閒將粉筆貌燈檠三千里外停

雲思十四年前舊雨情宦海無端人易老秋山有

路夢難成蒹葭我亦扁舟客倩寫湖山一角明

上元前一夕赴中東坊燈棚作

雙雙小隊引紅燈紅燈六對前導赤棒行街月乍升隔歲

倍教歡比戶上年因林逆甫靖停止燈火有年先喜報豐登花

開錦繡居中地五城各有品目惟中城有珠玉錦繡之稱綵結樓臺最

上層綵棚在正陽門坊南多少香車兼寶馬來宵煙火更飛

騰



上元夕赴燈棚作

又騎驄馬踏香塵簫鼓今番沸耳新銀燭萬行天  
不夜煙花十里地長春醺人玉友深杯領調將金  
吾舊制循三鼓後步軍統領於正陽門城上以燈  
繩曳取城外武營官名帖謂之調將百  
餘年來我亦康衢偕舞蹈相逢父老莫逡巡

上元後一夕赴燈棚作

依然玉樹照團團燈火沿街興未闌皓月恰從今  
夕滿好春還帶十分看徘徊天上魚龍夜指點人  
間解牙冠莫惜年年同達曙馬頭初日是長安

四月二十日蒙

恩擢戶科給事中恭紀

廿一人中第二排

是日引見七人為一排共三排樹名在次排之五承

恩先拔綠頭牌

頭排奏履歷畢動次至樹奏未畢即將籤拔出上執籤未簪毫敢

擬無雙士

同年孫望山亦於是日擢工科進秩俄分正五階一載

遷官緣

特簡

任御史甫六科聯隊有同儕壬戌同年擢給事者有吳退旃朱椒堂程

定甫夏森圃張秋圃卓海帆申鏡汀黃俊民至是凡十人

卻思無補

熙時盛旅進彌滋愧滿懷

寒香課子圖為厚圖太守

德生作

百本梅環屋數楹暗香深處讀書聲餐餘雪蕊清

官味

尊翁會官於杭

譜入燈花課子情五夜青氍懷棗士

卅年朱萼感華笙君家世有承恩樹不襲凌寒兩

到名

送史竹房

夢蛟

之官崇信

官柳行行照眼青送君西去濟清涇衣披越錦人

應豔

乞假歸道餘姚

路繞秦關我舊經

輦轂近陪驄馬步文章曾證鮎埼亭

官學傳時曾刻全祖望鮎埼亭

集

臨行莫奏伊涼曲野外薦于屬耳聽